

O Le Tatou Faamoemoega Faafaifeautalai

Elder D. Todd Christofferson

Semina mo Peresitene Fou o Misiona, 2008

Mafaufau i nisi o faaitaiga o eseesea i le va o le mea e tupu pe a faogatotonu le galuega faafaifeautalai i le faamoemoega faafaifeautalai, ma le mea e mafai ona tupu pe afai e na o gaoioiga faafaifeautalai lava e taula'i atu i ai:

(1) Afai e uunaia e le faamoemoega ia faifeautalai, latou te aoao atu tagata i se auala e fesoasoani ai ia i latou ia malamalama moni i le talalelei ma pe aisea ma pe faapefea ona latou salamo. Afai e le o taula'i atu faifeautalai i lo latou faamoemoega, atonu e na ona latou aoao atu lava ina ia ausia ai se numera faapitoa o lesona na aoaoina i le vaiaso. I lena tulaga, o le a latou taumafai ai ia uma le lesona nai lo le faalogo ma tali atu ma le toto'a i mea o loo i le mafaufau ma le lotu o le tagata sailiili. O le a latou faasoa atu faamatalaga ae le ofoina atu le faaolataga, ma o ni aafiaga matuai eseese na e lua mo se tagata sailiili (ma mo se faifeautalai).

(2) O faifeautalai o e e galo lo latou faamoemoega e ono "tatala o latou gutu" ma auai i gaoioiga saili mai, e faatumu ai le li'o o tagata aoao i se numera faapitoa o tino e aunoa ma le sailia ma le faalogo i le Agaga e iloatino ai po o ai o loo lagonaina le Agaga pe a latou tautatala atu. O le sailiga o le a taula'i atu i numera e aunoa ma le faatatau atu i le faamoemoega mo le liua.

(3) A aunoa ma le mafaufau i le faamoemoega o le faifeautalai, o lona uiga o le kalena mo fuafuaga o aso taitasi atonu o le a na ona avea o se kalena o fuafuaga ma taimi ma aso tuupoina. Ae peitai, o le avea o le faamoemoega ma uunaiga aupito sili ona taua, o le a avea ai le kalena faifuafuaga ma se mea faigaluega mo le faamautinoaina o mea e tatau ona tupu ina ia maua ai se taunuuga, o lona uiga, o le aumaia o le liua ma le papatisoga, ia mautinoa, e faailoaina, manatuaina, ma faia ia tupu e faatatau i tagata sailiili taitoatasi. A leai, e ono pa'u atu se faifeautalai i le maila o le manatu e faapea, o le pisi o le fua lea o lona faamanuiaina.

(4) O se faifeautalai e faapatinoaina lona faamoemoega, o le a tulimata'i atu i lona avanoa i aso taitasi e taumafai i le afioga a le Atua ona o lana suesuega o le a i ai le faamoemoega. O le a ia suesue mo tali i fesili loloto a ana tagata sailiili, faapea foi i ana lava fesili loloto. O le a ia vaavaai mo le taitaiga i auala e aoao

atu ai ma taitai ai tagata sailiili i le ala o le salamo. A aunoa ma lena lagona o le faamoemoega, atonu o le a tau leai se nau-nautai o se faifeautalai e uiga i suesuega faaetagata lava ia ma faalesoa. E ui na te ono tuuto atu le taimi, ae o le a aunoa ma le malosi ma le nau-nautai lea e mafai ona momoli atu ai mulimuli ane ana aoaoga faapea ma le agaga o faaaliga ma valoaga. (Tagai i le Alema 17:2–3; 43:2; MF&F 11:21, 25–26.)

(5) Atonu e faia e se faifeautalai ia faatinoga o le valaaulia o tagata ia auai i le Lotu ona e tailtonu o ia, o le mea lena e tatau ona faia e faifeautalai. Ae peitai, afai e mumu le faamoemoega faafaifeautalai i lona lotu, e malamalama le faifeautalai o le auai i le Lotu e taua mo le tagata sailiili ina ia atinae ai se nau-nautai malosi atu mo le papatisoga ma ia faataatia ai se faavae mo le tumau seia oo i le iuga i totonu o le feagaiga o le talalelei. Faatasi ai ma le faamoemoega tupito i le mafaufau, o le a faapea ona i ai i le faanatinati atili atu o le valaaulia ia auai i le Lotu, o le a ese atu le faamalamalama o le taua o le tapuai i le Sapati ma mea e faamoemoeina i se sauniga a le AAG i le Aso Sa, o le agaga lea e i ai faatasi ma upu a faifeautalai, o le a i ai se mana faatauanau lea semanu e le faatasi ai.

Faamolemole aua le le amanaia le mataupu muamua o le *Tala'i La'u Talalelei* ma lana fesili: "O le a lo'u faamoemoega i le avea ai ma se faifeautalai?" A malamalama ma talia e faifeautalai le faamoemoega o le aumai o tagata ia Keriso e ala i mataupu faavae ma sauniga o le talalelei toefuataiina, o le a latou malamalama ai o le galuega faafaifeautalai e le o se polokalama, o se galuega—o le galuega a le Tama, le Alo, ma le Agaga Paia. O le a latou malamalama e le o i latou o ni tagata faatauoloo, po o ni tagata e faaleleia ni mea ua leaga, ae o ni faiaoga o le amiotonu ua faatagaina ma tofiaina mai le lagi. O le a latou malamalama e leai se mea e maua ai e le lalolagi le alofa togiola ma le faaolataga ae e ala atu ia i latou ma le Ekalesia o loo fai ai i latou ma sui, O Le Ekalesia a Iesu Keriso o le Au Paia o Aso e Gata Ai. O le a latou malamalama i lo latou faamoemoega ma le mea e faatatau i ai le galuega lena, ma o le a latou tiotio i le faiga o le galuega a lo latou Tama. E pei o atalii o Mosaea, o le a latou aoao atu "ma le mana ma le pule mai le Atua" (Alema 17:3).



Fesili mo Talanoaga

1. E mafai faapefea ona iloa e se faifeautalai o loo taitaia e le faamoemoega faafaifeautalai ia ana gaoioiga?
2. E mafai faapefea e le taula'i atu i le faamoemoega o le galuega faifeautalai ona aafia ai le auala e faatino ai au gaoioiga faafaifeautalai i aso taitasi?
3. O a auala e fesoasoani ai le parakalafa mulimuli ia e malamalama i le natura e faavavau o mea o le a e faia i le avea ai o se faifeautalai?

